



**Selasa, 05 Juli 2022**  
**Ogen: Masmur 23:2-3**



*"Ipesenang-senangNa akyi"*



**L**a banci lang, kerina manusia pasti ndarami kesenangan bas doni enda. Amin gia erbage-bage ingan kesenangan e, senang ia perban lit erta-erta kegeluhenna, senang ia perban seh sekolah anakna, senang ia perban mejile jabaten pendahin perbulangenna, senang ia perban kelana kalak mehaga, senang ia perban mejile peturah sinuan-sinuanna ras sidebanna. Kam, kai nge jadi kesenanganendu paksa gundari enda? Rikutken situasi si genduari radu ras anak-anakta pe libur pas persekolahen, tenti jadi keriahen man banta ras anak-anakta adi si pake waktu bersama ras ia erdalan-dalan ku ingan si erbahansa ukurna meriah. Adi meriah ukur anak-anak e, tentuna kita orang tua pe meriah siapak.

Kitab Masmur 23 enda mereken pengajuk man banta lako menikmati kebersamaan isi jabu ras Tuhan. Perli retreat bersama keluarga kempak lau si teneng, pekesahkan i terug batang kayu ngenanami udara si sejuk si ibereken Tuhan. Ersada kita ras alam, i je kita erbagi ate keleng, nuri-nuri kerna pengalamennta ras Tuhan. Bagi daud nuri-nuri kerna pengalamen kinitekenna ras Tuhan man banta kerina. Tuhan jadi permakanna, si mereken ia man ras minem teptep wari, si njagai ia tupung lit i bas serangan musuh, si engkawali ia tupung lit perbeben si mberat. Tuhan si erbahansa ia la jumpa cilaka, amin pe enggo ndeher ku kelbung si gelap la perna aru atena.

Kesaksin daud e pe banci jadi kesaksinta man anak- jaunta, uga enggo Dibata mabai jabunta ku dalin si teneng, amin jumpa erbage kesulitan ras persoalen, iberekenna serpang puluh ras ketenengen rukur. Senang arah Dibata nari mabai kemalemen ate. ItambahiNa gegehta. kesenangan arah Dibata nari la terkata-kataken, melala kel dalanNa erban kita senang nggeluh ras Ia. Tupung kita nikapken family time, pengalamen nggeluh ras Tuhan e lalap perlu ituriken. Reh usurna si turiken reh bagesna hubungenta si mehuli ras Tuhan.